



Bájkkeavijssa NuorttaSálto

De dal julevsáme oahpponævo báhhti

Tæksta: Kitty Skapalen
Járggálibme:
Divte Media AS



Resurssaskávlá prosjæktajadediddje. Paul Gælok le virggáj biejadum prosjæktajadediddjen resurssaskávlån Ajluovtan. **PROSJEKTLADER** for ressursskolen. Paul Gælok er ansatt som prosjektleder for ressursskolen ved Drag.

Paul Gælok le virggáj biejadum prosjæktajadediddjen Ajluovta Skávlån pilotprosjevtan mij galggá julevsáme oahpponævojt buvtadit.

Duogásj

Oahpponævo julevsámegiellaj vádnuni. Divtasvuona suohkan rudájt oattjoj ávdđáprosjæktaj man ulmme lij plánit Ajluovta skávlån julevsáme guovlo resurssaskávlån, gánná akta dahkamusásj le járggálibme/ávdđánahttem ja hiebalasj oahpponævoj hiebadibme. Vaj dáv galggi nahkat de viertti resurssaskávlå ávdđánahtteduvvat julevsámegiellan vuodoskávlådasen.

Resurssaskávlå

Ajluovta skávlån le læhkám ávdásvástádus julevsámegiella áhpadas, jages 1985 sámegiellan nubbegiellan ja sámegiellan vuostasjgiellan jages 1991. Áhpadibme vuostasjgiellan tjadáduvvá sámegiellaj juohkka fágan mánájskávlån ja vargga juohkka fágan nuorájskávlån. Uddni li skávlån birrusij 100 oahppe ja birrusij 35 sijás li sámegiellaga.

- Ajluovta skávlån le stuorra fágalsj máhtudahka julevsámegiellan ja luondulasj le áhpadiddje barggi oahpponævoj ávdđánahttemijn, javllá prosjæktajadediddje Gælok. Aktan niellja virggeguojmij galggá sán dán jage buorep gáváv vidjurijs oadtjot.

Oahpponævvobuvtadibme ja guhkásáhpadibme

Ulmme prosjevtan le ávdđánahttet Ajluovta skávlån resurssaskávlån. Akta vájkkudimnævojs le oahpponævvobuvtadibme ja guhkásáhpadibme julevsámegiellan. Járggálit, ávdđánahttet ja hiebadahhtet girjev juohkka fáhkaj juohkka jahkedássaj le akta ulmijs, juogu girjien jali digitála hámen.

Guhkesájggásasj ulmme le resurssaskávlå galggá ávdásvástádusáv adnet guossidimes ja guhkásáhpadimes julevsáme oahppijs ietjas suohkanin ja

oahppiida ietjá sajijs lándan. Valla dárbahti ienep rudá guhkesájggásasj ávdedibmáj. Guhkesájggásasj ulmme le Ajluovta skávlån stuoves resurssaskávlån dahkat julevsámegiellan vuodoskávlån stuoves juollodimij doajmmaj ja ávdđánahttemij.

Fállu guhkásáhpadimev

Departemænnta Áhpadosdirektoráhta baktu le plánav ávdđánahttam guhkásáhpadibmáj. Dán plávan Ajluovta skávlå oajvvaduvvá áhpadimsaddjen guhkásáhpadimes julevsáme oahppiida moatten sajen lándan. Resurssaskávlå dahkamusá duodden oahpponævoj járggálibmáj ja ávdđánahttemij ja guhkásáhpadibmáj sjaddi tiebmábargo, doarjjot ietjá skávlåjt gatjålvisáj ma guoski julevsámegiellan áhpadibmáj ja rádiijt vaddet ja bagádallat æjgádiijt gudi ietja e sámegiellav buvte valla ajtu ájggu mánájt sámegiella áhpadussaj biedjat. Resurssa sjaddá sihke sijddabarggo-viehkke vuostasjgiellaoahppiida ja fállat áhpadasáv/lågádallamijt same dili birra Vuona vuodoskávlåjda ma ælla same skávlå. Ávdeduvvá aj aktisajbarggo julevsámij svieriga bielen ja ájggu ávdedit

Interregprosjevtav aktan Fylkkamánijn ja julevsáme birrasijn Svierigin. Ávdđálijuovlluj le aj ájádus sierra julevsáme giella, luonndo- ja kultuvrraskávlån ásadit.

- Lip guhkásáhpadimev Kárásjáhkáj álles jagev fállam oahppáj gænna le julevsámegiella vuostasjgiellan. Állu buoragit le mannam. Ja ietjåda li aj gatjådam guhkásáhpadimev julevsámegiellaj, duola dagu ulmutja Bådåddjon, javllá Gælok.

Áhpadiddje vádnuni

Sámegiellaáhpadiddje skávlån galggi oasev áhpadimájgestis adnet oahpponævvobuvtadibmáj. De le hásstalus ádá áhpadiddjiijt oadtjot ma máhtti oasev skávlå same-áhpadimes válldet.

Divtasvuona suohkanin le stuorra dárbo ávdđálijuovlluj ádá áhpadiddjiijt virggáj biedjat sámegiellajn fáhkasuorgen. Suohkan le giella doajmmaplávan áhpadosloahpádusáj loabedam suohkanij virgálettjajda gudi ájggu giellaáhpadasáv válldet, duodden li Nordlånda Fylkkamánnen áhpadosloahpádusá dán ulmmáj.

- Le stuorra hásstalus nuorajt áhpadiddjevirggáj oadtjot. Gæhttalip áttjudit sijáv gejna le máhtudahka, valla divna máhttelisuodaj ma udnásj nuorajda gávnuuji de le stuorra hásstalus. Sávvap dille buorrån tjavtja rájes.

Bargo organiserim

Skávlån le prosjæktajuogos jáhtuj biejaduvvam. Giellaáhpadiddje læhkámájgge binneduvvá 20 prosent 50 prosentajda. Ájggomus le guokta ja guokta áhpadiddje galggaba aktan barggat, ja navti prosjevtá várnnahisvuodav binnedip ja sij galggi gasskasattjat goabbák guojmmasis nanos bielijt ávkkit.

- Lip vihtta áhpadiddje gudi galggap resurssaskávlåjn barggat, javllá Gælok. Ja jur dan diehti gá diehti gánná skuovva dáddá, le ájnas jur sij dajna barggi ja e ietjá álggoláhá, miejnni sán.

- Moattes Divtasvuona álggolis li rinngum ja javllam sij máhtti járggálit, valla muv mielas ulmme skávlåjn resurssan gáhtu jus ietjåda bargov galggi válldet, javllá Gælok. - De dá máhtti Sámedikkijn guládallat ja ietja rudájt dáppet áhtsát.

- Lanjá resurssaskávlåj vádnuni. Valla dát le pilotprosjevta lágásj, de vierttip duov dáv gæhttalit ja dáhkkitidit.